

QUÆSTIO MEDICA,

*Cardinalitiis disputationibus manè discutienda in Scholis
Medicorum, die Jovis 19. Maii 1712.*

M. BERTINO SIMONE DIEUXIVOYE,
Doctore Medico, Præsides.

An lex animi motibus imperans sanitati consulat?

I.

NATURA infinitæ sapientiæ providentiæque, vel Deus ipse opifex rectorque universi, sapientissimè hominem condidit ut quàm diutissimè sanus ac tranquillus, nî perennis conservaretur. Ab illo tamen rerum ordine aberrasse hominem testatur intestinum bellum, dissidium domesticum, doloris sensus, animæ jugum, futurorum prænuncia morborum. Hinc anima, quæ objectorum sensibilibus monitis pro conservandâ sanitate lubenter auscultabatur, jam impetiosius moventibus, ejusdem sanitatis damno, duci se patitur, & quæ ratione ordinis & naturali amoris vinculo ad sui authorem trahebatur, sensuum nunc corporumque imperio subjicitur. *Domina gentium, princeps provinciarum facta est sub tributo.* Objecta sensibilia sub fucosâ boni imagine mentem deludunt, ac per sensuum organa, veluti totidem excubias, continuis adversisque hinc indè motibus cor agitant. Cupidine sanguis exæstuat, cor ardet, vehementius ac frequentius pulsatur: odio verò torpet, crassescit sanguis, moras trahit, fatiscit cor, spiritibus cerebri defraudatur, nauseabundus eructat stomachus. Timore cor trepidat, deliquium potitur, stagnat in pulmonibus sanguis, mens titubat, functionesque vitales & animales collabuntur. Tristitiâ hebescit animus, deprædantur spiritus, languidè micat cor, spissescit lympa, totumque corpus sensim contabescit. Irâ incandescent humores, bilis accenditur ac persæpe febrilis fermentatio sanguinis. Livore divellitur cor, inæqualiter pulsatur, ac modò sanguis incrassescit, modò turgescit. Pœnitentia corporis & animi quietem expellit, somnum fugat, famis & sitis sensum obtundit, sanguinisque subdulcem indolem in falsam aut falso acrem pervertit, quâ colliquatur magis ac magis sulphurea ejusdem textura. Ut sensuum voluptate dilabitur mens, sic spiritus distantur ac vires corporis resolvuntur. Libidinis æstro convellitur cor, liquefcit sanguis, dissipantur spiritus & lympa alibilis, totumque corpus marcescit atque diffunditur; hinc dissipatur tota substantia luxuriosè vivendo; hinc digestionum labefactio & morborum iliares. Saluberrimum ergo & necessarium præsidium illud habendum est quo effrænes animi motus coercentur.

A

QUISQUIS supremi numinis quaris argumentum quod omnibus præsit & curæta sapienter ministret, teipsum intueri. Nescio, inquit heroica mulier, „ quales in utero meo apparuistis, neque enim spiritum & animam donavi vobis „ & vitam, nec singulorum membra ego ipsa compegi, sed mundi Creator qui „ formavit hominis nativitatem, quique omnium invenit originem. Tam approposita configuratio materiæ partium, tam simplex organorum structura, tam regularis fluidorum & solidorum motus & consensus, tam elegans forma, tam mirum cogitationis & extersionis adversæ conjugium, majorem opificis attentionem, apparatus & accuratioris laboris impensam arguunt, quàm aspectabilis mundi fabrica. *Faciamus hominem*, fatur Deus; hæc verborum apparatu constat solius hominis præpollens dignitas, quæ trium divinitatis personarum consilium, curam, studium ac ministerium exposulare videtur. Naturam & causas animi motuum sciscitaris? res altioris indaginis est. Anima, indubitata cogitatio, inextensa, configurationis, divisionis, motûs incenscia, in hoc immortalis sibi conscia naturæ, nullum ex se respectum ad corpus habet, nec quidquam à corporibus pati potest. Solius Naturæ authoris lege sancitum est ut ex occasione corporis sensatio grata vel molesta in ipsam excitaretur. Licet corporis dimensionibus non respondeat nec ullo spatio circumscribatur, huic tamen corporis parti immediatè conjungitur ad quam ex toto corporis ambitu velut ad centrum ducuntur objectorum impressiones. Verùm hæc ad cerebellum ope nervorum transferuntur; hinc velut ex fonte scaturiunt spiritus, sobolescunt nervi sensûs ac motûs parentes: hoc astringit ligatura nervi quæ sensus & motus illico sufflaminantur. Cerebellum densiori substantiæ texturâ ac vegetiori pollet elatere. Fatiscente cerebro viget adhuc *cerebellum in Apoplecticis, nervisque octavi paris ac musculis appensis spiritus ministrat respirationis motibus famulantes; hinc cordis motus fovetur & vita. Huic ergo corporis parti immediatè conjungitur anima quæ ultimæ functiones vitales tuetur. At cogitatio ex se indifferenter se habet ad hoc vel illud objectum; ergo restringitur ad determinatum objectum, pænes fibrarum cerebelli motus, ab impressionibus objectorum in organa sensuum. Quoniam verò sensatio grata vel molesta voluntatem movet, animam infinito hiantem bono determinat ad objectum peculiare; planum est motiones animæ esse restrictiones impressi animæ motûs ab authore naturæ à se & ab omni bono ad objecta peculiariora quæ conservando corpori favent aut nocent. Hinc liquet objectis sensibilibus stimulari felicitatis desiderium ac voluptatis famem, nusquam expleri: neque enim sapientis ordinis ratione consultum est ut voluntas, seu vis motiva aut propensio animæ in omne bonum, in corporibus acquiescat quibus dummodò ad tempus & instabili fœdere conjuncta est. Verùm eadem sapientis ordinis ratio dictat impressum animæ motum ad bonum ad ipsum naturæ Opificem referendum, ut pote qui solus necessariò ac per se subsistit, & solus sensationes ad occursum corporum movet in animâ, eandem suprâ omnem sensum inebriare potest sincero gaudio. Hinc quam diù sensibilibus objectorum impressionibus obsequitur, peregrinatur à Domino. Hinc æstuosum & procellosum cor modò amore, gaudio, spe dilatat, sæpius tristitiâ, timore, odio premitur, diversis hinc illinc motibus jactatum, nusquam æquale,

Hoc petit, hoc spernit, repetit quod nuper omisit.

Æstuat, & toto disconvenit ordine vita.

Caliganti ergo rationi, quæ cerebri fibrarum modulatâ flexione leni ac levi spi-

373

rituum animalium motu, vestigiorum objectorum mutabili serie ac ordine pendeat, ac fluctuanti hinc atque illinc cordi utilis ac necessaria futura lex, quæ & illuminaretur intellectus & cor amoris ordinis obsequeretur: namque præcipuum *Donini lucidum illuminans oculos, convertens animas.* Mirare quod sola lex cordis hominis blanda cenciatrix, immoderatos & inæquales ejusdem cordis motus compescat, ac subigendo sensus pacem cordi conciliet. Quæ fuit legis curæ, studium, sollicitudo erga hominem! unum bonum docet, rationabile, necessarium, deletabile, æternum, ut huc omnis feratur amoris impetus, nec pluribus divelli cor motibus patitur. Parum objectis sensibilibus indulgendum monet, ne divisus sensus amoris ordinis & electionis hebescat. Vigilandum sedulo hortatur ne transmissæ ad cerebrum sensibilium objectorum impressiones fucosâ bonorum malorumve imagine cor exagitent; atque ita lenis & pacatus sanguinis & humorum motus foveatur, ac vigeat functionum vitalium integritas. Sic lex frequentiores morborum causas avertit: *Rex qui sedet super solium judicii sui dissipat omne malum intuitu suo.*

I I I.

COR esto oscillum vitæ seu præcipuum hydraulicæ machinæ organum: quibus ipsum commovetur; iisdem anima afficitur, ac voluntas concitatur. Neque tamen moveri ex se cor existimes: si enim oscillando & proprio elatere motus suos exereret, æqualis profectò foret vis dilatationis cordis ejusdem contracti cum eadem sit utriusque causa. At quàm validior contractio, quàm debiliior dilatatio, vel plusquam unum ad mille, percipiet ad sensum admota cuspidi cordis manus in cane vivente. Vidisti moveri cor, citra spirituum animalium influxum, à spiritu nitroso quem sanguis ex aëre lambit in pulmonibus, mox fibris ventriculi sinistri cordis afflandum. Non sanguis arteriæ coronariæ id munus obire videret, qui alternos atricularum & ventriculorum cordis motus, citra valvularum & machinarum multiplicem apparatus, moliri non possit, cui repugnat mira Naturæ simplicitas. Nec inde frustraneæ appendisse cordi nervos Naturam autumes, aut hinc exules velim spiritus animales inferas. Accelerari aut cunctari motum cordis, spirituum animalium influxu per nervos cardiacos, patet ex repentinâ mutatione pulsûs in animi pathematis. His objectorum impressionibus in cerebro & spirituum influxibus quibus cordis motus alteratur, motiones animæ intemè conjunxit Naturæ opifex, ac quibus legibus cogitationes aut rerum imagines cerebri vestigiis inarantur, iisdem ipsa ordinis ratio affectiones aut animi motiones iis fibrarum cerebelli oscillationibus addixit quibus mutaretur cordis motus. Sed pro diversis objectorum impressionibus in cerebro ac spirituum influxibus in nervos cardiacos diversæ cordis pulsationes, distributio diversæ sanguinis, ac spiritus animales in cerebri vestigia & nervos excurrunt, quibus congruenter ad objecta corpus componitur & coaptatur. Quantum animi pathemata sanitati faveant aut eandem labefactare possint hinc inferas quod sanguis in his modò segniùs modò celeritùs à corde trudatur, atque hic exæstuet & ardeat, modò torpeat. At verò sanitas pendet ex temperatâ fermentatione sanguinis, leri & æquabili fluidorum motu, consociantur ex æquo solida, sed modò præeant fluida, solida famulentur; secus enim solida motum impertiendo, ut tantumdem perderent quantumdem communicarent, inertia subsiderent, nisi essentiali fluidorum motu cicerentur, & præcariò moverentur. Argumentum fermentationis sanguinis idem est quo eandem explodere nituntur tritura præcones, microcosmicæ mechanicæ tirones: è sanguine, iniquiunt, nullâ arte elicitur acidum fermentationis author. Verùm si acidum alimentorum, si acorem eructantem è chymo, aperto stomacho canis viventis unâ

horâ à pascu, si quæ distillatione lactis prædeunt acida, sanguis non suggerat, nec nisi salsa aut salia fundat alkalia vegetæ aut ignitæ fermentationis factus; in-
concussum manet quod acida chyli sanguini affusi facescunt in salsa aut salia
acria, quas quidem salium commutationes aut novas formas nusquam assequeris
tritûs viâ. Non, si malleo & incudi nitrum & tartarum subijcias per annos, ni-
trum fixum aut sal tartari obtinebis; sed acidum pertinaciter teluctatur. Salium
ergo acidorum in alkalia conversio sanguinis fermentescens soboles. Nec huic
fermentationi obstat circularis, aut triturationis, ejusdem sanguinis motus; non
enim officit communis totius motus motui proprio partium: mixtum sal ammo-
niacum cum sale tartari aut calce vivâ in mortario quò magis pistillo massam tritu-
rabis, aut in vase impositam concuties agitabis & versabis quoquo versum, eò magis
ipsam fermentescere testatur intolerabilis urinosus fætor. Nec obtrudas deficere in
vasis ærem sanguini, aut spatium fermentationi idoneum. Devolvitur enim ma-
gna pars æris unâ cum sanguine animalium, etiam piscium, ut evincitur eorum
vesiculis ære turgidis qui ex solis arteriis advenit; ac tantò magis effervescent
principia fermentativa quantò magis angustantur, ut patet distractione vasorum
quibus continentur liquores fermentativi: sed quid hîc plura? redit argumentum.
Cum ergo pro validiori aut debiliori contractione cordis magis vel minus atteratur
sanguis sequitur ut acceleretur aut torpeat ejusdem fermentatio in animi pathematis,
ac pro spirituum animalium & recrementorum mutatione labefactentur
functiones animales & virales. Lex itaque, vitæ dux quàm optimus qui semper
ei consulat, dirigendo motus cordis, quibus vigentibus æquabiliter omnes motus
& sensus vigent, omnesque functiones alacriter peraguntur. Secus verò fatigante
cordis motu aut inæqualiter pulsante in animi pathematis nec recrementa secer-
nuntur è sanguine, morborum semina; fermentaque digestionis hebescent, altera
fons & origo morborum. Hos sistere spirituum animalium cordis & sanguinis mo-
tus ab objectis sensibilibus impressos aut impressionis sensum hebetare non animæ
datur, ac solum naturæ & cordis Opificem arguit cujus est liberare de sanguinibus.

I V.

OBJECTA sensibilia tribus diversis modis animam afficiunt, vel enim boni
speciem exhibent, vel speciem mali præ se ferunt, vel sub nullo respectu ad
nos oculis obversantur. Si primum, iisdem impressionibus objectorum ac cerebri
fibrarum vibrationibus, quibus spiritus animales rerum imagines exhibent, ipsi in
tubulos nervorum cardiacorum uberius influunt alternosque cordis motus vegetiores
uberior, humorum secernendorum, excretio, sanguisque defæciatio & alacrior fun-
ctiones omnes vitales & animales ministrat. Ergo sapientis ordinis ratione consul-
tum videtur ut anima inclinet & amoris motu prosequatur ea objecta quorum im-
pressæ imagines faustè ad eò vitæ functionibus succedere, quæve tam vegetam aut
âcrem machinamenti corporis dispositionem aut aptitudinem animæ demonstrant.
Si verò objecta, quæ sub specie mali obversantur, ita spiritus animales determinant
in nervos cardiacos ut ejusdem cordis motus cunctetur, collabatur atque fatiscat,
indè fiet quod anima declinet & aversetur ab his objectis quæ cordis & humorum
motum hebetarent functionesque omnes labefactarent; hoc observare est in odio,
tristitiâ, metu aliisque ejusdem generis animi motibus, in quibus languet cordis
motus & pulsus; contraquàm in amore, gaudio, spe, in quibus vegetior ac frequen-
tior micat cordis & arteriæ motus, color purpureus sanguinis in vultu efforescit to-
tumque corroboratur corpus. Tam inæqualis fluxus spirituum animalium ratio repe-

334

tenda ex diversâ fibrarum cerebelli commotione, majori vel minori, quâ spiritus in odio magis premuntur & fortius impelluntur intra nerveas cordis propagines; in amore verò lenius feruntur iidem spiritus & quasi undulatum confluunt in nervos cordis leviori fibrarum cerebelli concussione aut titillatione, atque hinc multò gravis anima percellitur à malo quam specie boni, quod quidem naturæ institutum corporis conservationi plurimum favet. Quî verò fiat ut rapidiore spirituum fluxu in nervos cardiacos, ac densiori eorundem copiâ & velut agrine factò, cunctetur motus cordis? vidisti aliàs tubulos nerveos hiare intrâ loculos fibrarum carnearum, spiritusque exundantes quo molimine lateralem dilatationem eodem nisu musculorum fibrarum longitudinalem contractionem promovere. Vidisti diversam insertionem nervorum cordis ac aliorum musculorum, si quidem illi inseruntur fibris tendineis quibus intersecantur loculi fibrarum carnearum cordis; hinc idem spirituum fluxus qui reliquorum musculorum contractionem nunc cordis dilatationem promovet adaucto elatere fibrarum tendinearum quo fibræ carneæ constringuntur, distentique loculorum parietes à fluido motrice ad se se mutuo adducuntur. Ergo à majori fluxu, copiâ & densiori agmine, spirituum animalium in cor, segnius ac languidiùs contrahetur in odio ob vim contra nitentem fluido motrici; secus in amore spiritus animales minori vi & quasi per manipulos aut subsultus influunt in fibras tendineas cordis, ac dum fibrarum carnearum dilatationem properant & earundem quoque contractionem accelerant, remisso alterнатam fibrarum tendinearum elatere, ipse fluido velociorem contractionem molienti faciliùs obsequuntur; hinc in amore vegetior ac frequentior cordis contractio. Neque gratis hoc esse dictum putes quod luculenter probari posset. Quàm citò cor ad aspectum terribilis cujuscumque objecti fatiscat, attende. Quî tam festinanter ejusdem motus sistat in timore percussis? pervolve causas omnes quæ remorari circuitum sanguinis ad cor aut fluidum ejusdem motivum suffurari aut vincula & compedes, ejusdem motum coercere aut influxum; & omnibus ritè perpensis fateri coges collabi subito motum cordis ob rapidiorem spirituum fluxum in nervos cardiacos ab impressione terribilis objecti, quâ, dum refluunt ab organis sensuum externis cerebrum versùs in orificia nervorum cardiacorum, cum impetu prosiliunt aut reflectuntur ad angulos seu æquales, seu inæquales cordisque motum prædicto modo cunctantur. Nec huic obeundo muneri officit diversa apparens soboles nervorum opticorum & octavi paris; licet enim nervi Cardiaci ex cerebello & spinali medullâ emanent, thalamique nervorum opticorum in ipso anteriori cerebri apice disseminentur, constat tamen istos aliùs aculterius propagari ac mediâ commissurâ cerebri ad cerebellum protendi; idemque connubium ac commercium reciprocum inter nervos secundæ & terciæ conjugationis, alioque cerebro appensos cum cerebello, innumeri propè effectus comprobant. Sic dum nervi olfactorii commoventur in extremis à quolibet corpore pungente aut quoquomodo vellitante, spiritus refluentes cerebrum versùs, quo motu sensationem excitant impingendo in fibras cerebri aut cerebelli, eodem divertuntur in orificia nervorum diaphragmatis aliorumque musculorum inspirationi & sternutationi simulantium: adeo ut licet aliundè constet orificia nervorum hiare in communi promptuario & receptaculo spirituum; ita tamen in origine suâ coaptantur, ut spiritus percussi ab extremis propaginibus nervorum in alios nervos influant, in motum acturi determinatas partes quæ concursu suo sibi mutuo opitulantur: ex illo soboletecentium nervorum ordine, respectu reciproco atque consensu; tum ex conjugio aut directione vestigiorum objectorum cerebri aut cerebelli, tota in animi pathema-

tis æconomia motuum corporis deducenda. An verò spiritus, ab extremis nervorum repulsi ad cerebrum, reflectantur in determinatos alios nervos ad angulos æquales, luminis instar, difficile est asserere; hoc enim proprium est corporum sphericorum aut eorum quæ quadratam figuram obtinent: at neutram figuram geometricè spiritibus ascribendam nullum demonstrat argumentum; sed de his jam satis est. Cum ergo objecta sensibilia quò magis aut frequentius impingunt in organa sensuum, eò magis flectuntur cerebri fibræ spirituum animalium motu atque dehiscunt insculpta vestigia; futurum ut quæ trita & patentior via eò vergat spirituum motus atque determinatio; adeoque cor magis ac magis commoveri necessum sit: sed quia quantò major excitatur sensuum voluptas aut quò diutius grassantur motus animi, tantò magis diffillantur spiritus animales fibrarum cerebri motrices, aut rapido & inæquali eorundem motu, refluxu ac influxu in propagines nerveas, cordis ac sanguinis motus alteratur functionesque vitales & animales inturbantur; futurum ut & voluptas cui mens inhiat citò dilabatur & fastidii & amaroris sensus suboritur. Sic sapientissimè jussit naturæ conditor, *ut quilibet inordinatus animus sit sibi metus pæna & supplicium*: sic homo sensuum voluptatem venando cuncta in circuitu perlustrat. ac esuriens in circulum revertitur. Tam inexhaustæ famis explendæ studium philosophorum animos torset; hi sensibus indulgendo rationem redarguentem ablegare conati sunt; alii verò, auctoritatis naturæ vim æmulantes, sanctitas unionis animæ cum corpore leges ad arbitrium flecti contendunt. Sed quàm à scopo aberrarunt! qui enim objecta sensibilia aucupantur spirituum exolutione sanguinis crassum alterant, ciborum irritamentis ac ingluviæ fermenta digestionis obtundunt, & crudorum humorum copiâ vasa ingurgitant ac molliorem viscerum compagem comprimunt: sic acidorum aut salso-acrium fermentorum indole modò febriles æstus cum inflammationibus partium accenduntur, modò sanguinis & humorum motus obortâ coagulatione sufflaminatur. *Qui voluptuose vescantur interierunt in viis*. Hi increpanti intus lumini frustraneo conatu subtrahere se nituntur, lucet enim in tenebris & utcumque naturalis unio animæ cum auctore naturæ, in quo vivimus & sumus, infirmari possit, & obnubilati cogitatio corporis commercio; dirimi tamen penitus & infringi nequit: si celaverint se ab oculis meis in profundo maris, ibi mandabo serpenti & mordebit eos. Nec alii sapientiores qui inanis gloriæ durâ cupidinis tyrannide, sanitati infausâ, se ex sensibilibus objectorum laqueis expeditos jactitant. Solus legis est objectis sensibilibus amarorem infundere, aut eorundem impressos motus hebetare aut animam majori delectatione vincere: *est enim penetrabilior omni gladio ancipiti & pertingens usque ad divisionem animæ, compagum quoque fibrarum & medullarum*. Sic lex inani fugaciam bonorum cupidine ut & malorum metu cor liberat. Sollicitudinem & inquietam vitam ex inordinato sui amore obortam docet; hæc veluti pyxide reguntur affectus, diriguntur actus, corriguntur excessus, componuntur mores ac tota vita ordinatur; hæc animum firmum & stabilem reddit, cordisque motuum æquabilitatem servando hominem saluberrimum efficit.

V.

QUICUMQUE homo hanc à naturâ organorum mechanicam dispositionem accipit, & impressiones objectorum aut utilium aut noxiorum quibus ducuntur cæteri animantes, sed quæ impressiones sensibilibus objectorum in animalibus fibrarum cerebri tremulis motibus citra sensum terminantur & eorundem objectorum usu desinunt; eadem objectorum impressiones cerebro hominis insculptæ animum voluptatis avidum stimulant ac cor perpetuâ jactatione commovent. Hinc à reliquis

animalibus diversus homo respuit quæ ad vitam servandam sufficiant, quantum sitis atque fames & frigora poscunt; ac contra voluptati indefinenter inhians prosequitur ciborum condimenta, lautiores cænas, irritamenta gulæ quæ morborum cohortem invehunt. Hinc divitiarum inexhausta sitis quæ terrâ pascitur & mari, livore torquetur, inanis gloriæ cupidine flagrat, quæritque quò se solis fulgor abscondat. Lex verò ut columna luminiscaliginosam rerum imaginem discutit & tanquam sacra anchora omnem inconstantiam & vagationem cordis expellit, sensuum fascinationem solvit, spiritualia bona & immutabilis naturæ objicit his quorum stabilitas pendet ex instabili objectorum corporeorum impressione, ac fluxili cerebri commotione: hinc homo moderatur in lætis, in adversis & extremis angustiis futurorum spe bonorum erigitur animo. Nos cum nullo horum indigeremus, habentes solatio sanctos libros qui sunt in manibus nostris. Mirare qui legis amore patrum nostrorum cesserit ignis vis & tormentorum atrocitas. Nunc ergo ò filii æmulatores estote legis & date animas vestras pro testamento patrum vestrorum. Lex ergo eadem rumentem animum deprimit, depressum & labantem erigit, & servat æquam mentem. Hujus observantia majorem voluptate sensuum delectationem habet. Narraverunt mihi iniqui fabulationes, sed non ut lex tua. Verùm sancta sanctis nec prophanum decet de his sermo; sed audi præceptorem legis. Testes invoco hodie cælum & terram quod proposuerim tibi vitam & mortem, ut diligas Dominum Deum tuum atque obedias voci ejus & illi adhæreas: ipse enim est vita tua & longitudo dierum tuorum. Nisi custodieris verba Regis dabit tibi Dominus cor pavidum & deficientes oculos & animam consumptam marore & erit vita tua quasi pendens ante te. Timebis nocte & die & non crederis vitæ tue. Nunc dices, quis mihi det vespertinam & vespere, quis mihi det matutinam? propter cordis tui formidinem. Quisquis ergo sanitatem curas legem consulas feriantibus animi motibus; exarentur verba legis in corde tuo & meditareris in eis; & ligabis ea quasi signum in manu tuâ & movebuntur inter oculos tuos, scribesque ea in limine atque ostiis domus tuæ, et auferet Dominus omnem languorem & infirmitates Ægypti pessimas; sic dominaberis inimicis cupiditatis & terroribus, sic vinces robustiores te & tradet Dominus multas gentes tibi & percuties eas usque ad internecionem; fili mi ne obliviscaris legis meæ & præcepta mea cor tuum custodiat; longitudinem enim dierum & annos vitæ & pacem apponent tibi. In hac semper lætaberis, sic vigebit motus cordis, sanguinisque & humorum debita fovebitur fluiditas undè absoluta functionum integritas. Pietas finis & complementum legis, ad omnia utilis, promissionem habens vitæ quæ nunc est & futura.

Ergo lex animi motibus imperans sanitati consulit.

Proponebat Parisiis JOAN. ES BESSE, Petrocorensis,
Baccalaureus Medicinæ. A. R. S. H. 1712.

Apud Viduam Francisci Muguet, Regis & Facultatis Medicinæ Typog. 1712.